

**Imaatigut angalasinnaanermut akuersisummit allagartaqartalernissaq aamma  
angallatit mikinerusut atorlugit imaatigut angalatilluni sillimanissamut pisariaqartunik  
peqartarnissaq pissappata suut suliniutit aallartittariaqarnersut pillugit apeqquteqaat  
aallaavigalugu oqallinnissamut siunnersuut.**

(Inatsisartuni ilaasortaq Andreas Uldum, Demokraatit)

### **Akissuteqaat**

(Ineqarnermut, Attaveqarnermut Angallannermullu Naalakkersuisoq)

Imarsiorerup isumannaatsuunissaa Naalakkersuisut pingaartitorujussuuat, aammalu Naalakkersuisut isumaqarput suliassaqarfip tamatuma aallunneqarnerata annertusineqarnissaa pisariaqartoq. Taamaattumik suliniutissat suut aallartinneqassanersut aalajangiisoqannginnerani Inatsisartuni kinguneqarluartumik oqalliseqatigiinnissaq Naalakkersuisut qilanaaraat.

Nunatsinni pissutsit allanngorsimapput. Imaatigut isumannaatsumik illersorneqarsinnaasumillu angalanissamut ilisimasat kinguaariinnit ataatsiniit tullernut – tassalu angajoqqaaniit meeqqanut – ingerlateqqinnejartarnerat nalinginnaajunnaarsimavoq. Perioriartornermi imaan angalaarneq ulluinnarni inuunerup ilaatut qaatuussarinngikkaanni, imaan pissusilersonissap ilisimaarinissaa kiisalu isumannaallisaanermi atortunik pisariaqartunik atuisinnaaneq pissusissamisuinnartutut isigineqarsinnaasanngilaq. Tamatuma kingunerisaanik ajunaartoqartuartarpooq, amerlanertigut angallatit minneritakuuffigisaannik, aammalu arlallit inuunerminnik annaasaqarfigisaannik. Ineriartorneq taanna unitsinneqartariaqarpoq, taamaattumillu ullutsinni inuussuttut kinguaariinnilu tullinnguuttussat suliassaqarfimmi tassani ilisimasaqalernissaat qulakkeerneqartariaqarpoq. Taamaattumik isumassarsiaq maannakkut suliniutaasut, qaammarsaanermik aallaaveqarnerusut suliassaqarfimmut inatsimmik nutaamik ilaneqarnissaannik aallaaveqartoq Naalakkersuisut tapersersorpaat.

Erseqqissaatigineqassaaq, imarsiorermut suliassaqarfik taassumalu ataani imarsiorerup isumannaatsuunissaa pillugu inatsisit tamarmik kiisalu umiarsuit isumannaallisaanermut atortuinut tunngasut danskinit oqartussaaffigineqarmata. Umiarsuarnut inuussutissarsiornermut atorneqartunut anginerusunut kiisalu ilaasunik angallassinermik suliaqartunut inatsisit pisariaqartinneqartut pigneqareerput, kisiannili Naalakkersuisut isumaat malillugu umiarsuarnut minnerusunut – taakkununngalu angallatit nuannaariutit ilanngulligit – maleruagassanik amigaateqartoqarpoq.

Imaatigut angallassinermut akuersissutip Kalaallit Nunaannut pissutsinut naleqqussarneqarnissaa pingaaruteqarpoq. Imaatigut angallassinermut akuersisummit pissarsinikkut Kalaallit Nunaanni imaatigut angallannermik ilinniarnikkut ilisimasassat tunngaviusut annertunerulissapput. Taamaalilluni imaatigut angallattut tamarmik isumannaassusiat annertunerulissaq. Tassalu angallammik atuinissamik kissaateqartut tamarmik imaatigut angallassinermut akuersisummit pisalernissaat anguniarneqarpoq. Soorunami kikkut tamarmik ilinniarnissaminnik angumersitissinnaaniarlugit, tamatuminnga atuutsitsilerniarnissamut piffissaq atorneqartussaq soorunami naapertuutissaaq.

Naalakkersuisut isumaat malillugu ilinniartitaanerni maannakkut ingerlanneqartuni (pikkorissutsimut uppermarsaatit ilangullugit) Kalaallit Nunaata imartaani angalanissamut akuersisummik pigisaqarnermi naatsorsuutigisanut naammassinnissinnaanngillat. Taamaattumik suliap ingerlanerani kingusinnerusukkut ilinniartitaanermik naleqquttumik piareersaasoqarnissaa pisariaqartussaavoq.

Angallatini minnerusuni isumannaallisaanermut atortoqarnissamik piumasaqaatit annertusineqarnissaannut piffissanngortoq pillugu siunnersuuteqartoq Naalakkersuisut isumaqatigaat. Ullumikkut biileraanni biilit qitequtaasaqarnerat pullattakkanillu illersuuteqarnerat apeqquserneqarneq ajorpoq. Taamatuttaaq angallatisigaanni angallatip isumannaallisaanermut atortoqarnissaa aamma nalinginnaasuuusariaqarpoq.

Siunnersuulli apeqqutinik isummerfigisassanik arlalinnik, aaqqissuussinerup atuutsinneqalinnginnerani aaqqinneqartariaqartunik nassataqarpoq:

- Imaatigut angallassinermut akuersisummik peqarnissaq pinngitsoorani pisussaassava, taamaalillunilu assersuutigalugu namminerisamik angallammik pisinermi taanna takutinneqartassava?
- Imaatigut angallassinermut akuersisummik pigisaqarnissamut ukiut killigititaasut ikinnerpaaffilerneqassappat aamma amerlanerpaaffilerneqassappat?
- Ilinniartitaaneq akisussaaffeqarfimmi sumi neqerooruutigineqartassava, aamma ungasianiit ilinniartitsinikkut sumiiffit amerlanersaanni pisariaqartitsineq naammassineqarsinnaassava?
- Angallatip tuninerani isumannaallisaanermut atortoqartinneqarnissaa inatsisitigut pisussaaffiussava?
- Nakkutilliisussaatitaanerup oqartussaasunut assigiinngitsunut suliakkiissutigineqarsinnaanissaa eqqarsaatigineqarsinnaava; soorlu Kalaallit Nunaanni Politiinut, Grønlands Kommando-mut kiisalu najukkani piniarnermik nakkutilliisunut?

Suliniutip ingerlateqqinneqarnissaa Inatsisartuni taperserneqassappat, oqallinnej tunngavigalugu inatsimmik naleqquttumik atuutsitsisoqalernissaa pillugu Naalakkersuisut danskit naalagaaffiat attaveqarfigissavaat.

Taamatut oqaaseqarlunga oqallinnissaq Inatsisartunut tunniuppara.